

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya

No. Telefon : 03-8882 5562
No. Fax : 03-8882 5569

OPERASI MEMBANTERAS ALAT GANTI MOTOSIKAL TIRUAN

PUTRAJAYA, 3 Julai 2020 - Satu operasi untuk membanteras penjualan alat ganti motorsikal tiruan telah dijalankan di sebuah syarikat yang menjual alat ganti motosikal di Kepong, Selangor yang melibatkan sepasukan Pegawai Penguat Kuasa Kementerian Perdagangan Dalam Negeri dan Hal Ehwal Pengguna (KPDNHEP) Ibu Pejabat Putrajaya.

Operasi ini dijalankan hasil daripada maklumat dan risikan yang diterima daripada wakil pemilik cap dagang berdaftar ke atas syarikat yang dijadikan tempat penyimpanan pelbagai alat ganti motosikal.

Hasil daripada pengaduan mendapati syarikat ini mendapatkan bekalan alat ganti motosikal daripada pembekal-pembekal dalam dan luar negara. Pihak syarikat menggunakan kaedah penjualan secara terus kepada orang perseorangan dan membuat pemasaran secara sendiri kepada ejen-ejen pembekal alat ganti motosikal dari pelbagai tempat.

Hasil serbuan dan pemeriksaan ke atas premis tersebut menemukan pelbagai alat ganti motosikal disyaki tiruan antaranya cermin sisi, timing chain, carburetor dan clutch. Kesemua barangan tersebut telah dirampas dan seorang suspek warganegara tempatan yang mengaku sebagai pengarah syarikat telah diambil keterangan. Nilai rampasan adalah dianggarkan berjumlah RM 34,587.80

Kes disiasat di bawah Seksyen 102 (1) (c) Akta Cap Dagangan 2019 iaitu mempunyai dalam milikan bagi maksud perdagangan barang-barang yang suatu cap dagangan berdaftar dipakaikan dengan salah. Jika di sabitkan kesalahan boleh dikenakan penalti seperti berikut:

(i) jika orang itu ialah suatu pertubuhan perbadanan, didenda tidak melebihi lima belas ribu ringgit bagi setiap barang-barang yang dipakaikan dengan salah cap dagangan berdaftar itu, dan bagi kesalahan yang kedua atau yang berikutnya, didenda tidak melebihi tiga puluh ribu ringgit bagi setiap barang-barang yang dipakaikan dengan salah cap dagangan berdaftar; atau

(ii) jika orang itu bukan suatu pertubuhan perbadanan, didenda tidak melebihi sepuluh ribu ringgit bagi setiap barang-barang yang dipakaikan dengan salah cap dagangan berdaftar atau dipenjarakan selama tempoh tidak melebihi tiga tahun atau kedua-duanya, dan bagi kesalahan yang kedua atau yang berikutnya, didenda tidak melebihi dua puluh ribu ringgit bagi setiap barang-barang yang dipakaikan dengan salah cap

dagangan berdaftar atau dipenjarakan selama tempoh tidak melebihi lima tahun atau kedua-duanya.

Pengarah Penguatkuasa KPDNHEP, Dato' Iskandar Halim Bin Hj. Sulaiman mengingatkan para peniaga agar lebih bertanggungjawab dan menghormati harta intelek orang lain dan memberi amaran kepada mana-mana individu mahupun syarikat supaya tidak melanggar undang-undang, terutama membabitkan penjualan dan pengedaran barangan tiruan bagi mengelak dikenakan hukuman berat mengikut undang-undang.

Beliau menggesa orang ramai supaya lebih berhati-hati dan bijak memilih barangan berjenama di pasaran agar tidak terpedaya dengan taktik sesetengah peniaga yang tidak beretika dan cuba mengambil keuntungan yang mudah. Orang ramai disarankan agar menyalurkan maklumat kepada pihak Kementerian dengan melaporkan kegiatan ini melalui hotline 1-800-886-800 atau 03- 8882 6088 di Enforcement Command Centre (ECC) atau hadir sendiri ke mana – mana pejabat KPDNHEP yang berhampiran supaya tindakan sewajarnya boleh diambil dengan lebih efektif selaras dengan cogan kata kementerian “PANTAS, CEKAP DAN EFEKTIF”.

#####

Dato' Iskandar Halim Bin Hj. Sulaiman

Pengarah Penguatkuasa

Kementerian Perdagangan Dalam Negeri Dan Hal Ehwal Pengguna
(KPNDHEP)

3 Julai 2020

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampar sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkap dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusanniaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

